

Referencia:	2019/12054E
Procedemento::	Expedientes de aprobación y modificación de Ordenanzas Fiscales
Interesado:	
Representante:	
NEGOCIADO DE SECRETARÍA XERAL (493)	

DITAME

Aprobación inicial da ordenanza fiscal xeral de contribucións especiais pola ampliación ou mellora do servizo de intervención en emerxencias do Parque de Bombeiros do Polígono de San Cibrao das Viñas da Deputación Provincial de Ourense

O Sr. Secretario expón o contido da proposta.

Tras un breve debate sométese a votación a proposta, e co voto favorable do Grupo Popular (5) e de Democracia Ourenzana (1), e a abstención do Grupo Socialista (3), do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente a Ordenanza fiscal xeral de contribucións especiais pola ampliación ou mellora do servizo de intervención en emerxencias do Parque de Bombeiros do Polígono de San Cibrao das Viñas da Deputación Provincial de Ourense, conforme co seguinte texto:

Artigo 1º.- Obxecto e fundamento legal.

1. Constitúe o obxecto da presente ordenanza fiscal a regulación xeral das contribucións especiais que poida impoñer a Deputación Provincial de Ourense, nos seguintes supostos:

a) Pola ampliación dos servizos de prevención e intervención en emerxencias do Parque de Bombeiros do Polígono de San Cibrán das Viñas, como consecuencia dos plans de investimentos neste parque. Para estes efectos, considerarase ampliación do servizo calquera investimento que supoña unha mellora da calidade das infraestruturas e dos equipamentos e vehículos do parque e do persoal ao seu servizo, ou un incremento das unidades de equipamento e vehículos adscritas ao servizo, así como as obras de reforma, ampliación ou

gran reparación e a substitución de equipamentos e vehículos obsoletos, sen que sexa necesario que esas melloras impliquen a incorporación de novas prestacións no ámbito funcional do servizo.

Considerarase equipamento calquera ben moble de carácter inventariable e de titularidade provincial que estea adscrito ao servizo de intervención emerxencias.

b) Polo establecemento de novos parques de bombeiros, que amplien o ámbito territorial de actuación ou melloren a prestación do servizo no dito ámbito.

2. Os investimentos que se financien mediante contribucións especiais deberán recollerse nun plan de investimentos, que se aprobará previa ou conxuntamente co acordo de imposición e ordenación concreta das contribucións.

Os plans de investimentos poderán ter carácter plurianual, cun límite máximo de catro anualidades para a súa completa execución.

3. A presente ordenanza fiscal se dita no exercicio da potestade tributaria que corresponde Deputación Provincial ao abeiro do establecido no artigo 6.2.b) da Lei 5/1997, de 22 de xullo, de Administración Local de Galicia, así como do establecido no artigo 133 do Texto Refundido da Lei reguladora das Facendas Locais.

Artigo 2º. Feito impoñible.

O feito impoñible das contribucións especiais estará integrado polo especial beneficio obtido polos suxeitos pasivos pola ampliación dos servizos de emerxencia que presta o Parque de Bombeiros do Polígono de San Cibrán das Viñas ou o establecemento de novos parques de bombeiros, nos termos previstos no artigo 1.

O beneficio especial para os suxeitos pasivos prodúcese pola mera execución dos investimentos de que se trate, con independencia do grao de recepción ou utilización efectiva do servizo de prevención e intervención en emerxencias por parte dos suxeitos pasivos en cada anualidade.

As contías recadadas polas contribucións especiais só poderán destinarse a sufragar os gastos de investimento previstos no correspondente acordo concreto de imposición de contribucións especiais.

Artigo 3º. Suxeitos pasivos.

1. Son suxeitos pasivos das contribucións especiais reguladas na presente ordenanza as entidades aseguradoras que operen, no ámbito territorial de actuación do Parque de Bombeiros do Parque de San Cibrán das Viñas, no ramo 8 de seguros distintos ao de vida e riscos accesorios (ramo de incendios e elementos naturais), definido no Anexo X da Lei 20/2015, de 14 de xullo, de ordenación, supervisión ou solvencia das entidades aseguradoras e reaseguradoras.

A consideración de suxeitos pasivos destas entidades aseguradoras obedece á obtención pola súa parte dun beneficio especial derivado tanto da actividade de prevención como de actuación en sinistros que integra o servizo de intervención en emerxencias do Parque de

Bombeiros de San Cibrán das Viñas, na medida en que estas actividades reducen a sinistralidade no ámbito territorial de actuación do servizo, tanto no relativo ao número de sinistros como aos danos causados por estes, o que reduce os custes económicos derivados das indemnizacións ás que teñen que facer fronte as aseguradoras do ramo.

2. Para estes efectos, o ámbito territorial de actuación do servizo de prevención e intervención en emerxencias do Parque de Bombeiros do Polígono de San Cibrán das Viñas corresponde aos municipios de San Cibrán das Viñas, Taboadela, Paderne de Allariz, Maceda, Baños de Molgas, Pereiro de Aguiar, Esgos e Nogueira de Ramuín.

Non obstante o anterior, o dito ámbito de actuación poderá ampliarse no futuro. De se-lo caso, os acordos concretos de imposición e ordenación das contribucións especiais especificarán esta circunstancia, entendéndose ampliado o ámbito territorial de aplicación das contribucións aos municipios de que se trate.

Artigo 4º. Base imponible.-

1. A base imponible das contribucións especiais reguladas nesta ordenanza estará constituída, como máximo, polo noventa por cento do importe total dos investimentos previstos nos concretos acordos de imposición e ordenación de contribucións especiais que se diten ao seu abeiro.

Os acordos concretos de ordenación fixarán motivadamente o importe da base imponible en cada caso.

2. Non obstante o anterior, o importe estimado dos investimentos previstos en cada acordo terá carácter de mera previsión. Se o custe real da execución destes investimentos resultase maior ou menor do previsto, se tomará aquel para o cálculo das cotas correspondentes.

Non será de aplicación esta regra no suposto en que a variación do custe dos investimentos consista nun incremento do seu orzamento que obedeza á súa modificación substancial por decisión da Deputación Provincial. Para estes efectos, entenderase por modificación substancial a introdución de novas obras ou subministracións non previstas no acordo inicial, ou a variación das características esenciais das ditas obras ou subministracións, calquera que sexa a súa causa.

Sen prexuízo do anterior, o importe das modificacións substanciais poderá incluírse na base imponible das contribucións mediante a modificación do correspondente acordo de imposición, sen que, en ningún caso, poida ter carácter retroactivo.

3. Nos supostos nos que a Deputación Provincial obteña subvencións ou donativos para a realización dos investimentos financiados con contribucións especiais, ou baixas na licitación dos ditos investimentos, a base imponible se entenderá automaticamente modificada, reducíndose o importe das subvencións ou doazón ou das baixas obtidas da dita base. Igualmente se modificará a base imponible no suposto en que o importe dos investimentos se reduza por calquera outra causa.

Artigo 5º. Cota tributaria.-

1. A base imponible repartirase en proporción ás primas recadadas, no exercicio anterior e no ámbito territorial de actuación do Parque de Bombeiros, por cada entidade aseguradora contribuínte, e ata un máximo do 5 % das primas recadadas.

Para estes efectos, o importe das primas que se considerarán serán os establecidos na Disposición Adicional 14ª da Lei 20/2015, de 14 de xullo, de ordenación, supervisión e solvencia das entidades aseguradoras e reaseguradoras, ou norma que no futuro a substitúa. Na actualidade, estes importes son o 100 % das primas dos seguros de incendios e o 50 % das primas dos seguros multirriscos que inclúan o risco de incendios.

2. Os excesos sobre a cota máxima por anualidade trasladaranse aos exercicios sucesivos, ata a súa total amortización, incluíndose nas correspondentes liquidacións anuais.

3. Nos supostos en que un suxeito pasivo efectúe unha doazón á Deputación Provincial que poida ser utilizada para o financiamento das actuacións previstas no Plan, o importe da doazón reducirá, total ou parcialmente, a cota do doante. De existir un remanente da doazón tra-la dita compensación, este destinarase a reducir a cota dos restantes suxeitos pasivos, rateándose entre estes proporcionalmente.

Artigo 6º. Devindicación. Pagamentos a conta.

1. As contribucións especiais devindicaranse no momento da execución do plan de investimentos recollido no acordo concreto de imposición.

Nos supostos en que os Plans de Investimentos teñan carácter plurianual, as contribucións devindicaranse cando se execute cada unha das anualidades do Plan, dando lugar á correspondente liquidación anual. Para estes efectos, e ao abeiro do disposto no artigo 33.1 do Texto Refundido da Lei reguladora das Facendas Locais, cada anualidade do Plan considerarase unha fracción do investimento.

Sen prexuízo do anterior, a Deputación Provincial liquidará provisionalmente, en cada anualidade, o importe da contribución especial correspondente a ese exercicio, en función do custe estimado no Plan, quedando obrigadas as entidades aseguradoras ao seu pagamento a conta no prazo de pagamento voluntario dende a súa notificación.

Unha vez executado o investimento, e no prazo máximo de catro anos dende a data da súa efectiva recepción pola Deputación Provincial, procederase á liquidación definitiva, na que se compensarán os pagos anticipados a conta realizados.

Nos supostos en que os pagos a conta fosen realizados por unha entidade inexistente no momento da liquidación definitiva, esta xirarase á entidade que legalmente a suceda.

No suposto de que os pagos a conta excedesen da liquidación definitiva, procederase á devolución de oficio do exceso, incrementado no tipo de xuro legal do diñeiro dende a data de ingreso do pago a conta. Igualmente, procederase á devolución de oficio no caso de que os pagos fosen realizados por quen non teña a condición de suxeito pasivo no momento da devindicación, sen prexuízo do previsto no parágrafo precedente para os supostos de sucesión de entidades.

Artigo 7º. Exencións e bonificacións.-

Non se recoñecerán en materia de contribucións especiais outros beneficios fiscais que os establecidos en disposicións con rango de Lei ou en tratados ou convenios internacionais.

Agás que na norma que os estableza se dispoña o contrario, os titulares dos beneficios fiscais deberán solicitar a súa aplicación á Deputación Provincial, con expresa mención da normativa na que se funde o seu dereito.

Cando se recoñezan beneficios fiscais nas contribucións especiais, as cotas que corresponderían aos beneficiarios ou o importe das bonificacións non poderán ser obxecto de distribución entre os demais suxeitos pasivos.

Artigo 8. Imposición e ordenación concreta das contribucións especiais.-

A exacción das contribucións especiais precisará a previa adopción, polo Pleno da Deputación Provincial, do acordo de imposición e ordenación en cada caso concreto. O acordo de imposición e ordenación adoptarase sobre a base dun plan de investimentos aprobado con carácter previo ou simultáneo, e determinará a base imponible e a súa distribución por anualidades en caso de plans plurianuais, suxeitándose en todo momento ás regras establecidas na presente ordenanza xeral. Nos supostos en que o ámbito territorial de actuación do Parque de Bombeiros de San Cibrán das Viñas se estendese a algún outro municipio, o acordo de imposición deberá precisar o seu concreto ámbito territorial aplicable.

Non poderá iniciarse a execución dos investimentos financiados con cargo a contribucións especiais ata que non se adopte o acordo de imposición e ordenación concreta correspondente.

O acordo de imposición e ordenación concreta será obxecto de publicación no Boletín Oficial da Provincia e no portal de transparencia da Deputación Provincial, e se notificará individualmente aos suxeitos pasivos, se estes fosen coñecidos no momento da súa adopción. No caso de que os suxeitos pasivos estean agrupados en entidades para a xestión das súas obrigas como contribuíntes que subscribisen un convenio de colaboración coa Deputación Provincial, o acordo notificarase ademais a estas entidades.

Contra o acordo de imposición procederán os recursos establecidos no noso ordenamento.

Artigo 9º. Xestión, liquidación, inspección e recadación.

1. As contribucións especiais esixiranse en réxime de liquidación. A liquidación será practicada pola Deputación Provincial, aplicando as regras establecidas nesta ordenanza e no acordo de ordenación concreta, sobre a base da información sobre as primas das entidades aseguradoras que operen no ámbito territorial de aplicación e que fosen facturadas no exercicio inmediatamente anterior. Esta información será proporcionada polo Consorcio de Compensación de Seguros, ao abeiro do establecido na Disposición Adicional 14ª da Lei de Ordenación, Supervisión e Solvencia das Entidades Aseguradoras e Reaseguradoras.

As liquidacións expresarán a cota individualizada que corresponda a cada suxeito pasivo, e notificaranse individualmente, ou a través da entidade xestora que poidan constituír os suxeitos pasivos, conforme ao previsto no apartado seguinte deste artigo.

2. A Deputación Provincial poderá subscribir convenios de colaboración con entidades constituídas polas entidades aseguradoras para o cumprimento das súas obrigas tributarias. Estas entidades poderá asumir a representación dos suxeitos pasivos para todas as

actuacións que lles correspondan na xestión tributaria das contribucións, incluída a realización dos pagamentos, e en tal caso terán a consideración de interesadas no expediente a tódolos efectos, entendéndose exclusivamente con elas os procedementos de xestión e recadación, en tanto non conste a revogación da representación conferida polos suxeitos pasivos.

3. A xestión, liquidación, recadación e inspección das contribucións especiais se realizará na forma, prazos e condicións que establece a Lei Xeral Tributaria e demais normas aplicables á xestión dos tributos locais.

Artigo 10º. Infraccións e sancións.

En materia sancionadora se aplicará o réxime establecido na Lei Xeral Tributaria e demais normativa aplicable aos tributos locais.

Disposición Final.

A presente Ordenanza entrará en vigor ao día seguinte ao da publicación do seu texto íntegro, definitivamente aprobado, no Boletín Oficial da Provincia.

2º) Someter o presente acordo de aprobación inicial ao trámite de información pública, por un prazo de trinta (30) días hábiles, mediante a inserción de anuncios no BOP de Ourense, na sede electrónica da Deputación en nun dos xornais de maior difusión da provincia, todo elo de conformidade co previsto no artigo 17 do Texto Refundido da Lei reguladora das facendas locais. Durante o dito prazo, as persoas interesadas poderán formular as reclamacións que consideren oportunas, as cales deberán ser resoltas polo pleno da corporación provincial, a través de acordo de aprobación definitiva. No caso de que non se formularsen reclamacións en prazo, o acordo de aprobación inicial elevarase a definitivo, sen necesidade de acordo plenario expreso.